

Pazlicy (Deutsch-Baselitz); b) němske resp. přeněmčene wsy: 6) Bambruch (Bernbruch, prjedy Börenbach), 7) Łukecy (Hausdorf), 8) Šumbach (Schönbach), 9) Špital (Spittel). — Wokoło l. 1750 běštej hišće zafarowanej wsy: Petershain a Pěskecy (Piskowitz).

Cyrkej: Přenje serbske Bože služby do reformacije dostawachu drje so Serbam w nětčišej katechismusowej abo pohrjebnej cyrkwi sw. Jodokusa abo Jobsta, štož je najstarši Boži dom w Kamjeńcu; bórzy po reformaciji bu klósterska cyrkej z cyłym klóštrum wot zarjadnistwa Bernhardinow w Bechinje w Čechach městu Kamjeńcej přepodata z tym wuměnjenjom, zo ma so w klóštrje šula zarjadować a w cyrkwi Serbam serbski předawać; a to stawa so hač do džensnišeho dnja. Čelne předowanja pak maju so w pohrjebnej cyrkwi a to hižo 1848 najbóle němski. Hač do l. 1842 mějachu so w klósterskej cyrkwi kóždu njedźelu dopołdnja jeno serbske Bože služby, popołdnja pak němske katechismusowe rozwučowanja; Němcy ze wsow běchu a su hišće do měšćanskeje cyrkwe sw. Marje připokazani; tuž su tež serbscy předarjo při klósterskej cyrkwi z dobom diakonjo při němskej měšćanskej cyrkwi. Při wulkim wóhnju 1842 pak so klósterska cyrkej, kiž bě 1499 natwarjena a sw. Hanje poswjećena, sobu wotpali. Tak dołho hač so cyrkej z nowa twarješe (wokoło 8 lět), mějachu so serbske Bože služby w pódlanskej katechismusowej cyrkwi. W tutom času nuzy a njeporjada sta so wulcy škódné přeměnenje za serbsku wosadu. Wobzamkny so mjenujcy, zo ma so Serbam nic wjacy, kaž dotal, kóždu njedźelu, ale jenož kóždu druhu njedźelu serbski předawać. Za to so tu njedźelu, hdyž serbski kemš njeje, w klósterskej cyrkwi němski předuje.<sup>61)</sup> Nimo toho maju so hišće serbske kemše na wšitkich přěních swjatyh dnjach, na žnjowym swjedženju, kermušu a poslednju njedźelu cyrkwinskeho lěta a skóněnje na wšěch swjatyh dnjach, kiž do tydženja padnu. Serbska spowědź je kóždu přěnju njedźelu měsaca a k tomu kóždy přěni swjaty dzeń. — Khowanja

<sup>61)</sup> Merkel (Erdbeschreibung) piše wok. l. 1800, njewěm po kajkim źórle, zo so w klóšt. cyrkwi serbski, husto pak tež, předewšěm w posće, němski předuje; Ramming (Kirchenstatistik) z l. 1828 zaso praji: tu su z wjetša jenož serbske předowanja a druhdy tež němske.